

Berdh yn Efanvos – Kynsa rann: Marow yw Krysrudh (arta)

[Intro]

Efanvos... an or dhiwettha.

Yth esowgh ow koslowes orth vyajow an sterlester FSS Kalesvol dres pypm bledhen a'y vyssyon golonnek:

Lytherenna henwyn-tyller na wrug den vyth bythkweth aga lytherenna!

War vord an Kalesvol yma bagas ad-hoc a eth bardh, tri ofiser-lytherennans yn aga mysk.

Pennkard:

Log an kapten, sterdydh 10056.4. Hwegh seythen a-ban essyn ni an Norvys, ha morale an meni yw pur isel. Yma Ofiser Kober y'n Sickbay hag Ofiser Sten y'n Brig wosa omladh war-lergh gwari Skrabbel. Martesen wosa Shore Leave yn Edenva Dhew y fydh taklow gwell...

Pysk:

Kapten, ma mesaj o' tos der'n ganel sodhogel.

Pennkard:

War an skrin, Ofiser Pysk!

Pysk:

Pesk, syr. Gen <e>.

Pennkard:

Da lowr.

(Y klewir polsik a dros dhyworth an ynterkom.)

Chegwidden:

Kapten Pednkard?

Pennkard:

Ya, Admiral Chegwidden?

Chegwidden

'Ma plan nowyth. Ny yllo'hwei gortos obma rag Shore Leave. Res ew dhe'hwei gorra Kadnas Anasazi dhe Benryn Trei rag keskusulyans meur y vri.

Pennkard:

Mes Admiral, ow meni a res kavos nebes R hag R. Re bell re beun ni y'n lester ma heb gweles bejethow nowyth, hag yma an ofisoryon-lytherennans owth omladh arta. Yma Ofiser Sten y'n Brig, hag yma Dr Hals lemmyn owth oberi war Ofiser Kober rag tenna an lytheren 'Q' yn-mes a'y---

Berdh yn efanvos, Rann 1: Marow yw Krysrudh (arta)

Chegwidden:

Da lowr, da lowr. Nynj yw res rei dhybm an manylyon. Eus ofiser lytherednans nag eus et an prison po et an kloa'ji?

Pennkard:

Wel... yma Ofiser Pysk. Mes ev yw nebes ... glyb.

Chegwidden:

Res yw dhodho gwul y seyth gwella.

Pennkard:

Aye, aye, admiral.

Sogh:

Syr.

Pennkard:

Ya, Mester Sogh?

Sogh:

An meni treusporthel a lever bos Kannas Anasazi ha'y fardellow devedhys.

Pennkard:

Da lowr. Res yw dhymm kavos ow unnform ala leun. Lavar dhedhi my dh'y weles dhe brys kon haneth.

Loveday:

Kapten! Kapten!

Pennkard:

Ya, Lt. Loveday?

Loveday:

Yma kudynn timer ow tochya Ensyn Krysrudh...

Pennkard:

Kudynn timer?

Loveday:

Wel, ledhys y feu henna, del hevel.

Y feu y gorf marow kevys y'n lyverva.

Yn-dann an Gerlyver Etymologiethek Ystynnys.

Pennkard:

Gast an ast! Oll an kevrollyow?!

Berdh yn efanvos, Rann 1: Marow yw Krysrudh (arta)

Loveday:

Na – an kynsa etek lyver ha tri ugens hepken. Y'n gwella prys.

Pennkard:

A wodhon ni pandr'a era Krysrudh orth y wul kyns ev dhe vos ledhys?

Sogh:

Yth esa ow kortos an Gannas.

Pennkard:

A wrug ev omvetya gensi? Herwydh usadow, helergh yw hi.

Sogh:

Nyns on ni sur a henna, Kapten.

Pennkard:

Yn neb kas y fydh res dhyn kavos Krysrudh nowyth.

Mester Sogh! Gwren ni erhi onan nowyth dhyworth an gaslys.

A viras Hals orth an korf?

Sogh:

Gwrug, Kapten... yma ev orth dha wortos y'th Stevel Ombareusi.

Pennkard:

Stevel Ombareusi? Ah! Ty a vynsa leverel 'yn ow Ready Roun'!

Sogh:

War ow flanel vy, gwell yw genen 'Stevel Ombareusi'.

(Y'n ~~Stevel Ombareusi~~ Ready Roun)

Pennkard:

Mester Hals--

Hals:

Doktour!

Pennkard:

Doktour Hals, a wruss'ta mires orth korf Ensyn Krysrudh?

Hals:

Gwrug, kynth o nebes re flat dhe wul lies prov....

Berdh yn efanvos, Rann 1: Marow yw Krysrudh (arta)

Pennkard:

Th era va y'n lyverva dherag an Gerlyver Etymologiethek Ystynnys pan veu ledhys.
A yllsys ta determya mars era va ow mires orth onan a'n kevrolyow?
Da via godhvos an pyth a redyas kyns ev dhe verwel.

Hals:

Dammit, Jowan! Medhyk ov vy, nyns ov vy gwithyas lyverva!

Pennkard:

Da lowr, da lowr. Mar kwre' ta kavos lyververk po trogh paper po neppyth war an korf,
mar pleg lavar e dhymm. Henn yw oll, Mester Hals.

Hals:

Doktour!

Pennkard:

My a'th henow 'Eskern' alemma rag.

Hals (yn lev isel):

Henn yw pur dhiskortes *krodhvol* *krodhvol*...

Pennkard:

Nebonan re ladhas Ensyn Krysrudh. Arta.

Krysrudh truan... ny wor den vyth y hanow byhan hogen.

Prag yma luck mar dhrog dhe'n teylu ma!

A vydh an ofiseryon-lytherennans owth omladh hwath?

A lytherennir hanow Ofiser Pysk gans <y> po gans <e>?

Goslowewgh orth "Berdh yn Efanvos" an nessa gweyth rag an disklosyans!